

[0131]

US WURK YN NIJ HABYT

As ús lêzers it foarste nûmer fan 'e sawnde jiergong fan dit blêd ûnder 'e eagen krije, sil it harren fuortynienen opfalle, dat der eat foroare is. Oant distiid ta waard "Us Wurk", hwat it technyske part oanbilanget, forsoarge fan 'e kopiearynrjochting Fedde Dykstra to Ljouwert. Nou 't it lykwols hwat rommer soppet, koene wy der ta oergean, ús orgaen yn printe foarm forskine to litten. Dat tonei û.o. de lê- en lûdtekens better útkomme sille as yn offsetdruk, leit yn 'e reden. Wy nimme oan, dat de lêzers wiis binne mei it nije habyt, dêr't de firma J.B. Wolters ús blêd yn stutsen hat. It soe ús fansels wakker oanstean, as wy har wurdearring aenst oan in stream fan kopij fornimme koene!

Der bliuwt ús nou allinne noch oer, de hear F. Dykstra, de eardere printer, tige to tankjen foar de flyt, dy't er sûnt 1952 op it uterlik fan ús blêd dien hat. Wy hawwe altiten noflik meiinoar oparbeide en it muoit ús sadwaende oan 'e iene kant wol, dat it nou ta skieden kommen is. Ta ús blidens stimde de hear Dykstra ús mei, dat it bilang fan ús tydskrift en dêrmei fan 'e Fryske filology yn dit gefal de trochslach dwaen moast.

En sa stiet dan fan 1958 ôf in oare printer noed fan 'e útjefte fan "Us Wurk", dat krekt as alearen wer forgeses oan eltsenien tastjûrd wurde sil, dy't niget oan 'e Fryske taelkunde hat.

Wy wolle hjir jit oan taheakje, dat wy war dwaen sille, om de lêzers rju forskaet fan bydragen to jaen. Dat hâldt sadwaende yn, dat ús alle artikels wolkom binne, dy't op de iene of oare wize mei ús tael en skriftekennisse gearhingje. As it heal kin, soene wy bygelyks bûten de wenstige stúdzjes oer wurdôfliedingen en tekstforklearringen ek wol ris artikels oer ús eigen tongslaggen en dy fan ús East-en Noardfryske stambruorren, oer staveringskwestjes en taelsuverens opnimme wolle. Us blêd moat him nei ús bitinken net allinne op it Frysk fan it forline rjochtsje, mar tagelyk in spegel wêze fan itjinge der hjoed-de-dei op it Fryske taelmêd libbet en geande is. It wurd is nou oan ús lêzers en allegearre, dy 't it goed mei de saek fan Fryslân miene!

DE SAMLERS.